

**INTERNACIONALNI BURČ UNIVERZITET
INTERNATIONAL BURCH UNIVERSITY**



PRAVILA STUDIRANJA ZA PRVI CIKLUS STUDIJA

UNDERGRADUATE RULES OF STUDY

2023

© International Burch University

S A D R Ź A J

I. OPĆE ODREDBE	3
Predmet i definicija	3
Oblici studija	3
II. ORGANIZACIJA STUDIJA	3
Realizacija nastave	3
Određivanje studijskih bodova	4
Trajanje studija	4
Struktura studijskog programa	4
Silabusi nastavnih predmeta	4
Organizacija studijske godine	5
Organizacija nastave	5
Izvođenje nastave u specifičnim okolnostima	6
Plan rada	6
Registracija predmeta	7
Evidencija podataka	7
Evaluacija nastave	7
III. ORGANIZACIJA STUDIJA NA DALJINU (DL STUDIJ) VANREDNOG STUDIJA	17
Studij na daljinu	7
Vanredni studij	8
Prisustvo na nastavi	8
IV. UPIS NA STUDIJ I NAPREDOVANJE U TOKU STUDIJA	8
Status studenta	8
Prelazi studenata na Univerzitetu i između univerziteta	8
Priznavanje ispita	9
Mobilnost studenata	9
Prava studenata u okviru mobilnosti	9
Gostujući studenti	10
Mirovanje prava i obaveza studenta	10
Zahtjev za mirovanje prava i obaveza	10
Prestanak studentskog statusa	10
Prava i obaveze studenta i studentski standard	11
Prava studenata sa poteškoćama u razvoju i osoba s invaliditetom	11
Nastavak studija nakon ispisa ili isključenja	12
V. VREDNOVANJE RADA STUDENATA	12
Postupak provjere znanja i ocjenjivanja	12
Prisustvo na nastavi	13
Organizacija ispita, praktičnog i stručnog rada kod pojedinih oblika nastave	13
Vrednovanje znanja studenata	13
Oblici provjere znanja studenta	14
Postupak provjere znanja i ocjenjivanja	14

Završni ispit i ispitni rokovi	14
Akademsko nepoštenje	15
Polaganje ispita pred komisijom na zahtjev studenta	15
Razlozi za izuzeće člana akademskog osoblja sa provjere znanja	15
Ponavljanje završnog ispita	16
Imenovanje komisije za završni ispit	16
Prelazak u narednu studijsku godinu	16
Ovjera semestra i studijske godine	17
Završetak ciklusa studija	17
Akadska titula, naučno, umjetničko i stručno zvanje	17
VI. PRIPREMNA ŠKOLA ENGLESKOG JEZIKA	17
Organizacija i program Pripremne škole engleskog jezika	17
Polaganje ispita znanja engleskog jezika	17
Detaljnija organizacija	18
VII. ZAVRŠNI RAD (DIPLOMSKI RAD)	18
Završni rad	18
Tema završnog rada	18
Prijava završnog rada	18
Predaja završnog rada	18
Provjera završnog rada	19
Obrana završnog rada	19
Repozitorij završnih radova	20
Zaštita rezultata istraživanja završnog rada	20
VIII. ISPRAVE O DIPLOMAMA	20
Diploma	20
Izdavanje duplikata diplome	21
Poništavanje i oglašavanje diplome nevažećom	21
Izdavanje podataka iz službenih evidencija	21
IX. PRELAZNE I ZAVRŠNE ODREDBE	21
Tumačenje	21
Stupanje na snagu	21

Na osnovu člana 61. Zakona o visokom obrazovanju Kantona Sarajevo („Službene novine Kantona Sarajevo“ br. 36/22), a u vezi sa čl. 36. i čl. 153. Statuta visokoškolske ustanove Internacionalni Burč univerzitet – International Burch University, Senat Internacionalnog Burč univerziteta je na svojoj 201. sjednici, održanoj 27.09.2023. godine, usvojio sljedeća

PRAVILA STUDIRANJA ZA PRVI CIKLUS STUDIJA NA VISOKOŠKOLSKOJ USTANOVI INTERNACIONALNI BURČ UNIVERZITET – INTERNATIONAL BURCH UNIVERSITY

I. OPĆE ODREDBE

Član 1. (Predmet i definicija)

- (1) Ovim pravilima bliže se uređuje organizacija i izvođenje studija prvog ciklusa (redovni studij), organizacija studija na daljinu i vanrednog studija, upis na studij i napredovanje studenata u toku studija, vrednovanje rada studenata, dodjeljivanje stepena i diploma, izdavanje isprava o studijama, kao i druga pitanja od značaja za završetak studija prvog ciklusa na organizacionim jedinicama visokoškolske ustanove Internacionalni Burč univerzitet – International Burch University (dalje: Pravila studiranja).
- (2) Studij prvog ciklusa na organizacionim jedinicama visokoškolske ustanove Internacionalni Burč univerzitet – International Burch University (u daljem tekstu: Univerzitet) organizuje se i ostvaruje u skladu sa Zakonom o visokom obrazovanju Kantona Sarajevo i Pravilima studiranja zasnovanim na Evropskom sistemu prenosa bodova (ECTS).
- (3) Riječi muškog ili ženskog roda upotrijebljene u ovim Pravilima se koriste neutralno i odnose se jednako na muški i ženski rod.

Član 2. (Oblici studija)

Studij prvog ciklusa studija se može organizovati u punom fondu sati predviđenom nastavnim planom i programom (redovni studij) ili u fondu sati prilagođenom studentima koji nisu u mogućnosti pohađati redovni studij (vanredni studij i studij na daljinu / DL studij).

II. ORGANIZACIJA STUDIJA

Član 3. (Realizacija nastave)

- (1) Univerzitet organizuje i izvodi studij prvog ciklusa iz naučnih i stručnih oblasti za koje je registrovan i akreditovan od strane nadležnih organa Kantona Sarajevo i Bosne i Hercegovine.
- (2) Nastava može biti organizovana u učionicama, laboratorijama, odnosno nastavnom prostoru Univerziteta, na daljinu ili kombinovano, te u prostorima nastavnih, naučno-istraživačkih i umjetničko-istraživačkih baza i poslovnih subjekata u kojima se provodi dualno obrazovanje.
- (3) Nastava može biti organizirana na jednom od zvaničnih jezika Bosne i Hercegovine i/ili na engleskom ili nekom drugom stranom jeziku.
- (4) U toku nastavnog procesa, predmetni nastavnici su obavezni koristiti univerzitetske informacijske sisteme za komunikaciju sa studentima, a u svrhu olakšavanja istog.
- (5) U realizaciji nastavnog procesa, svi studenti imaju jednaka prava, obaveze i mogućnosti, bez diskriminacije po bilo kojem osnovu.

Član 4.
(Određivanje studijskih bodova)

- (1) Jedan semestar studija nosi najmanje 30 (trideset) ECTS bodova, odnosno najmanje 60 (šezdeset) ECTS bodova na nivou studijske godine.
- (2) ECTS bodovi se određuju na osnovu prosječnog rada studenta neophodnog za stjecanje predviđenih ishoda učenja, pri čemu jedan ECTS bod predstavlja, 25 - 30 (dvadeset – trideset) sati ukupnog prosječnog angažovanja studenta.
- (3) Studentu se priznaju i dodatni ECTS bodovi na nivou semestra, odnosno studijske godine, a koje je ostvario na osnovu dodatnog odabira predmeta, odabira izbornih predmeta koji nose više ECTS bodova, priznavanje predmeta po osnovu mobilnosti i priznavanja predmeta iz necikličnih oblika studija.

Član 5.
(Trajanje studija)

- (1) Studij za sticanje kvalifikacije prvog ciklusa studija traje 3 (tri) odnosno 4 (četiri) godine, ili 6 (šest) odnosno 8 (osam) semestara redovnog studiranja, a vrednuje se sa najmanje 180 (stotinu osamdeset) odnosno najmanje 240 (dvije stotine četrdeset) ECTS studijskih bodova.
- (2) Student koji je položio sve ispite predviđene za upisani studijski program i ispunio sve ostale obaveze propisane Statutom Univerziteta, ovim Pravilima i drugim općim aktima Univerziteta stiče diplomu prvog ciklusa studija odgovarajućeg studijskog programa (najmanje 180 ECTS bodova za trogodišnji studij, odnosno najmanje 240 ECTS bodova za četverogodišnji studij).
- (3) Uz diplomu studija prvog ciklusa izdaje se dodatak diplome (Supplement) radi detaljnijeg uvida u nivo, prirodu, sadržaj, sistem, pravila studiranja i postignute rezultate tokom studija.
- (4) Pored diplome, studentima mogu biti dodijeljena i univerzitetska priznanja ovisno o akademskom uspjehu u toku trajanja ciklusa studija.
- (5) Odluku o dodjeli univerzitetskih priznanja, kriterijima, sadržaju i obliku istih donosi Senat Univerziteta.

Član 6.
(Struktura studijskog programa)

- (1) Studij prvog ciklusa se organizuje u skladu sa studijskim programom koji sadrži podatke o opisu studija, trajanju studija, stručnom i naučnom zvanju stečenom po završetku studija, uslovima upisa na studij, ishodima učenja koji se stiču ispunjenjem studijskih obaveza, predviđenim znanjima, vještinama i kompetencijama, okvirnom sadržaju obaveznih i izbornih predmeta i broju sati potrebnih za njihovu izvedbu (silabusi), jeziku nastave za svaki predmet, bodovnu vrijednost svakog predmeta određenu u skladu sa ECTS-om, obliku provođenja nastave i načinu provjere znanja za svaki predmet, ciljevima i ishodima učenja za svaki predmet, popisu predmeta koje student može izabrati s drugih univerzitetskih studija, te odredbe o tome da li i pod kojim uslovima studenti koji su prekinuli studij ili su izgubili pravo studiranja mogu nastaviti studij.
- (2) Studijski program reguliše i uslove koje student treba da zadovolji za sticanje određenog znanja, i to:
 - a) prikaz obaveznih i izbornih predmeta (kurseva) po studijskim godinama i semestrima;
 - b) broj sati individualnog opterećenja studenta po predmetu (kursu);
 - c) broj ECTS bodova za svaki predmet (kurs);
 - d) druge oblike nastave namijenjene sticanju i usavršavanju profesionalnih znanja i vještina (seminari, tematske klinike, debatni časovi, praktični rad i dr.);
 - e) prikaz obaveznih uslova za pohađanje nastave i polaganje predmeta (kurseva);
 - f) prikaz modula i blokova, ukoliko je nastava organizovana na takav način;
 - g) završni rad (diplomski rad), ukoliko je predviđen nastavnim planom i programom.

Član 7.
(Silabusi nastavnih predmeta)

- (1) Silabus je deskriptivni tekst akademske prirode, čija je svrha ustanoviti sve relevantne informacije u vezi predmeta koji su sastavni dio nastavnog plana i programa.
- (2) Silabus je, u principu, pripremljen prije početka akademske godine, i integrisan je u studijski program.
- (3) Silabus je sastavljen od sljedećih dijelova:

- a) osnovnih informacija u vezi predmeta, kao što su: ime predmeta, status predmeta, semestar u kom je predmet dostupan, koliko ECTS bodova predmet nosi, koliko predavanja sedmično predmet ima, i ukupni broj sati predmeta po semestru, kao i sve preduslovne predmete ili preduslovno znanje vezano za predmet;
 - b) informacija u vezi instruktora, uključujući ime, e-mail adrese, predviđene termine za konsultacije i napomene;
 - c) pregleda predmeta, koji sadrži suštinu predmeta i opisuje sadržaj predmeta općenito, kao i njegov krajnji cilj;
 - d) ciljeva i svrhe predmeta, kao i znanje, vještine, i sposobnosti koje studenti treba da savladaju do kraja semestra kako bi položili predmet;
 - e) literature predmeta, u koju spada obavezna i preporučena literatura koju studenti moraju pročitati i biti upoznati sa, da bi uspješno položili predmet;
 - f) sadržaja predmeta, koji sadrži teme koje će se slušati na predavanjima i vježbama;
 - g) načina ocjenjivanja i evaluacije studenata, u koji spada svaki segment ocjenjivanja studenata i izračunavanje procenta njihove ukupne ocjene; i
 - h) analize evaluacije studenata i ispitnih rokova/datuma, u šta spada i kratko objašnjenje metode i roka ili datuma za istu.
- (4) Predmetni nastavnik ima pravo da prilagodi silabus predmeta, bez da izmijeni njegov osnovni cilj, koji je definisan u stavu (3) t. c) i d) ovog člana.

Član 8. (Organizacija studijske godine)

- (1) Akademska godina za prvi ciklus studija, u pravilu počinje prvog oktobra, a nastava, u pravilu, počinje prvog ponedjeljka u oktobru.
- (2) Nastava se organizuje u dva semestra: zimski i ljetni.
- (3) Senat Univerziteta najkasnije 60 (šezdeset) dana prije početka izvođenja nastave za studijsku godinu utvrđuje i objavljuje kalendar organizacije i realizacije nastavnih programa.
- (4) Nastava traje, u pravilu, 15 (petnaest) sedmica kontinuiranih aktivnosti u svakom semestru.
- (5) U izuzetnim okolnostima nastava može trajati i kraće i izvoditi se u drugom obliku, o čemu odluku donosi Senat univerziteta uz obavezu realizacije propisanog fonda sati.
- (6) Ljetni odmor traje najduže 8 (osam) sedmica.
- (7) Univerzitet može odobriti izmjenu oblika realizacije nastavnog procesa ako je članu akademskog osoblja opravdano spriječen da izvodi nastavu, a posebno ako mu je odobreno odsustvo radi naučnog, umjetničkog ili stručnog usavršavanja ili obavljanja aktivnosti od posebnog interesa za Univerzitet.
- (8) Odluku o izmjeni oblika realizacije nastavnog procesa iz stava (7) ovog člana donosi Senat Univerziteta na prijedlog vijeća fakulteta.

Član 9. (Organizacija nastave)

- (1) Nastava se realizira i izvodi prema utvrđenom rasporedu sati za sve predviđene oblike studija.
- (2) Univerzitet, odnosno fakultet objavljuju raspored sati iz stava (1) ovog člana najkasnije 10 (deset) dana prije početka realizacije nastave.
- (3) Raspored sati, iz objektivnih razloga, može biti predmet izmjena nakon objave istog.
- (4) Raspored sati sadrži: naziv nastavnog programa, oznaku studijske godine, naziv predmeta, vrijeme (dan i sat) održavanja nastave, mjesto održavanja nastave (sale, laboratorije), imena nastavnog osoblja koje izvodi nastavu i druga uputstva o nastavi.
- (5) Nastava se odvija u časovima u trajanju od 45 minuta. Između dva časa nastave predviđena je pauza u trajanju od 15 minuta.
- (6) Nastava na svim odsjecima Univerziteta, osim Odsjeka za orijentalnu filologiju, izvodi se na engleskom jeziku i/ili bosanskom/hrvatskom/srpskom.
- (7) Nastava na Fakultetu za edukaciju i humanističke nauke, Odsjek za orijentalnu filologiju, smjer Turski jezik i književnost, izvodi se na turskom jeziku.
- (8) Senat Univerziteta može, prije početka studijske godine, posebnom odlukom utvrditi da se nastava za pojedine predmete organizuje na drugim jezicima.
- (9) Predmetni nastavnik obavezan je da u prvoj sedmici nastave upozna studente s planom rada na predmetu.

- (10) Odgađanje nastave od strane predmetnog nastavnika nije dozvoljeno, osim iz opravdanih razloga i uz saglasnost dekana organizacione jedinice.
- (11) Svako odgađanje predavanja, uključujući i predavanja odgođena radi neradnih dana, mora biti nadoknađeno u potpunosti.
- (12) Svako snimanje predavanja ili praktičnog rada bez dopuštenja predmetnog profesora je zabranjeno, te podliježe disciplinskom postupku u skladu sa općim aktima Univerziteta.

Član 10.
(Izvođenje nastave u specifičnim okolnostima)

- (1) U specifičnim okolnostima koje mogu objektivno utjecati na realizaciju nastave u sjedištu Univerziteta (pandemija, prirodna ili druga nepogoda), nastava i ispiti se mogu organizirati kroz formu učenja na daljinu za sve oblike studija, korištenjem naprednih informacionih tehnologija i *online* platforme Univerziteta.
- (2) Oblik studija koji se realizira učenjem na daljinu (DL studij) predstavlja način izvođenja nastave u okviru kojeg se korištenjem naprednih kompjuterskih tehnologija i interaktivnih nastavnih materijala osigurava izvođenje nastavnog procesa jednako nastavnom procesu u učionici (tradicionalni ili redovni oblik studija).
- (3) Ako se usljed okolnosti iz stava (1) ovog člana redovni studij, djelimično ili u potpunosti, ne može realizirati u prostorijama Univerziteta, studenti upisani na taj oblik studija mogu pohađati nastavu i polagati sve provjere znanja (uključujući i završne ispite) putem *online* platforme Univerziteta za vrijeme trajanja takvih okolnosti.
- (4) Ispiti organizirani putem naprednih video tehnologija, odnosno *online* platforme Univerziteta obavezno se pohranjuju u univerzitetskoj elektronskoj arhivi.
- (5) Sve ostale specifičnosti se regulišu posebnom odlukom kojeg donisi Senat Univerziteta.

Član 11.
(Plan rada)

- (1) Akademsko osoblje je obavezno ličnim prisustvom i angažmanom u potpunosti realizirati utvrđeni plan rada na nastavnom predmetu na koje je izabrano, odnosno na kojem je angažirano.
- (2) Izuzetno, iz razloga opravdanog odsustva dužeg od četiri sedmice, izabranog člana akademskog osoblja u realizaciji nastavnog plana i programa iz stava (1) ovog člana, uz prethodno pribavljenu odluku vijeća fakulteta, može zamijeniti drugi član akademskog osoblja kojeg predloži predmetni nastavnik.
- (3) U slučajevima opravdanog odsustva člana akademskog osoblja kraćeg od četiri sedmice, propuštena nastava se mora nadoknaditi u periodu ne dužem od četiri sedmice od završetka odsustva.
- (4) Termin za nadoknade propuštene nastave iz stava (3) ovog člana trebaju biti usaglašeni sa terminima pohađanja nastave studenata, sa njihovim obavezama na drugim predmetima i biti javno objavljeni.
- (5) Fakulteti su obavezni utvrditi postupke za praćenje i evidentiranje redovnog i urednog ispunjavanja nastavnih obaveza, a posebno redovnosti održavanja predavanja, postavljanja materijala na informacionu platformu Univerziteta, njihovog redovnog nadopunjavanja i dostupnosti nastavnika studentima u objavljenim terminima za konsultacije.
- (6) Postupci iz stava (5) ovog člana minimalno podrazumijevaju prikupljanje i provjere evidencija pohađanja nastave potpisanih od studenata, prikupljanje i provjera evidencije ispunjavanja obaveza vanjskih saradnika i drugih angažovanih u radu sa studentima, periodične provjere dostupnosti nastavnika u terminima za konsultacije i slično, o čemu vijeće fakulteta donosi posebnu odluku prije početka akademske godine, a koja uključuje i predviđene sankcije za neispunjavanje obaveza akademskog osoblja u realizaciji nastave.
- (7) Termin za konsultacije članova akademskog osoblja sa studentima u toku sedmice moraju biti usklađeni sa planom realizacije nastave, tako da su prilagođeni obavezama akademskog osoblja kao i potrebama studenata.
- (8) Konsultacije se mogu organizovati kao kabinetske konsultacije, konsultacije u učionici, konsultacije korištenjem elektronskih vidova komunikacije ili konsultacije organizirane na drugi pogodan način u skladu sa specifičnostima nastavnog predmeta.
- (9) Nastavnici i saradnici su obavezni osigurati najmanje 5 (pet) sati kabinetskih konsultacija sedmično u terminima koji se za aktuelni semestar javno objavljuju, a ostali članovi akademskog osoblja prema dogovoru sa dekanom u slučaju potrebe.

Član 12.

(Registracija predmeta)

- (1) Student registruje predmete (kurseve) koje treba da pohađa i polaže u narednoj studijskoj godini, odnosno semestru, prije početka nastave u odgovarajućem semestru sukladno terminima za registraciju predmeta predviđenim akademskim kalendarom.
- (2) Registracija predmeta se obavlja kroz informacijski sistem Univerziteta.
- (3) Registracija predmeta vrši se do opterećenja od 30 ECTS bodova za semestar, odnosno 60 ECTS bodova za akademsku godinu, osim u slučaju registracije nepoloženih predmeta iz prethodne akademske godine kada student ima pravo prenijeti u narednu akademsku godinu u okviru istog ciklusa studija najviše 12 ECTS bodova ili najviše dva nepoložena predmeta koji nisu preduslovi za slušanje nekog od predmeta u novoj studijskoj godini.
- (4) Pored izuzetka iz prethodnog stava, posebno nadareni studenti imaju mogućnost registrovati više od 60 ECTS bodova po godini studija u skladu sa uslovima propisanim Statutom.
- (5) Pri registraciji obaveznih i izbornih predmeta, student je dužan prvo registrovati ranije nepoložene predmete, a potom ostale predmete predviđene nastavnim planom i programom.
- (6) Izborni predmeti se biraju sa liste ponuđenih predmeta od strane nadležnog odsjeka, a koji su predviđeni nastavnim planom i programom.
- (7) Odsjek je obavezan studentima ponuditi minimalno jedan izborni predmet više od ukupnog broja izbornih predmeta koji se registruju u datom semestru.
- (8) Studijski predmeti koje je student registrovao mogu se mijenjati nakon njihove verifikacije uz odobrenje šefa odsjeka.

Član 13.

(Evidencija podataka)

Podaci o registrovanim predmetima automatski se unose i pohranjuju u informacijski sistem Univerziteta.

Član 14.

(Evaluacija nastave)

- (1) Praćenje uspješnosti nastave sprovodi se anketiranjem studenata u skladu sa općim aktima Univerziteta.
- (2) Odluku o anketiranju, terminima sprovođenja, sadržaju i načinu obrade ankete donosi Senat.
- (3) Konačni podaci o ocjeni za svaki predmet unose se u personalni dosije nastavnika.
- (4) Nastavnik izabran po prvi put u akademsko zvanje, kao i nastavnik koji po prvi put predaje određene predmete, ima pravo da zahtijeva da se podaci o prvoj godini njegove nastave ne unose u dosije.
- (5) Dekan je dužan da nastavnika čije su ocjene znatno ispod prosjeka pozove na razgovor, ukaže mu na nedostatke i predloži načine za otklanjanje tih nedostataka.

III. ORGANIZACIJA STUDIJA NA DALJINU (DL STUDIJ) I VANREDNOG STUDIJA

Član 15.

(Studij na daljinu)

- (1) Studij na daljinu (u daljem tekstu: DL studij) predstavlja oblik studija u okviru kojeg se korištenjem naprednih kompjuterskih tehnologija i interaktivnih nastavnih materijala osigurava izvođenje nastavnog procesa jednako tradicionalnom obliku studiranja.
- (2) Studenti upisani na DL studij svoje nastavne obaveze izvršavaju u virtuelnoj učionici koja podrazumijeva izvođenje nastave posredstvom interneta, odnosno DL platforme (sa udaljene lokacije nastavnog osoblja i studenata).
- (3) Univerzitet realizira DL studij za studijske programe u okviru kojih je predviđen upis studenata na takav oblik studija.
- (4) DL studij se realizira sukladno Standardima i normativima za obavljanje djelatnosti visokog obrazovanja na području Kantona Sarajevo (u daljem tekstu: Standardi i normativi) na način da se minimalno 1/3

nastave redovnog studija realizira online.

- (5) Tačan fond sati koji se realizira online u okviru DL studija, te druge specifičnosti realizacije ovog oblika studija utvrđuje Senat usvajanjem općih i pojedinačnih akata.
- (6) Kada se nastava na DL studiju u potpunosti realizira online, ispiti se obavezno organiziraju u sjedištu Univerziteta, osim u slučaju prirodnih ili drugih nepogoda kada studenti pristupaju ispitima putem DL platforme Univerziteta.
- (7) O ispitima koji se održe na način iz stava (6) ovog člana, vodi se uredna evidencija.
- (8) Detaljna organizacija DL studija uređuje se posebnim pravilnikom koji usvaja Senat.

Član 16. (Vanredni studij)

- (1) Vanredni studij je oblik studija koji se realizira u fondu sati prilagođenom studentima koji nisu u mogućnosti pohađati redovni studij.
- (2) Detaljna organizacija vanrednog studija uređuje se posebnim pravilnikom koji usvaja Senat.

Član 17. (Prisustvo na nastavi)

Studenti upisani na redovni studij obavezni su prisustvovati na svim nastavnim aktivnostima u minimalnom iznosu od 70% od predviđenog fonda sati za takve oblike izvođenja nastave, dok studenti upisani na vanredni studij i studij na daljinu (DL) nisu obavezni prisustvovati nastavnom procesu.

IV. UPIS NA STUDIJ I NAPREDOVANJE U TOKU STUDIJA

Član 18. (Status studenta)

- (1) Status studenta stiče se upisom na odgovarajući studijski program.
- (2) Student se pri upisu studijske godine opredjeljuje za predviđeni dio studijskog programa obima najmanje 30 ECTS bodova za semestar, odnosno najmanje 60 ECTS bodova za godinu.
- (3) Sa svakim studentom se zaključuje ugovor o studiranju, kojim se regulišu međusobna prava i obaveze.
- (4) Status studenta priznaje se i studentu koji se prebacuje - transferira sa drugog univerziteta, ukoliko ispuni propisane kriterije za taj status. U tom slučaju, vrijeme studiranja na drugom univerzitetu uračunava se u ukupno trajanje studija.

Član 19. (Prelazi studenata na Univerzitetu i između univerziteta)

- (1) Studentu se može omogućiti prelazak - transfer sa jednog studijskog programa na drugi pod uslovima koje utvrđuje vijeće organizacione jedinice.
- (2) Pravo na prelazak može se ostvariti prije početka nastave u semestru, odnosno uz odobrenje vijeća organizacione jedinice i nakon početka nastave u semestru.
- (3) Uz zahtjev za promjenu studijskog programa prilažu se dokumenti o postignutom uspjehu na studiju, odnosno studijskom programu sa koga se student transferira.
- (4) Vrijeme studiranja na studijskom programu sa koga se student transferira uračunava se u ukupno trajanje studija.
- (5) Prelazak – transfer studenata sa drugih Univerziteta vrši se u skladu sa bolonjskim načelima i ECTS bodovnim sistemom.

Član 20.

(Priznavanje ispita)

- (1) Studentu koji je položio ispit na drugom studijskom programu priznaje se položen ispit, ako predmet iz kojeg je ispit položen po svojoj sadržini i obimu odgovara predmetu koji je student upisao, što se dokazuje dokumentima predviđenim ECTS pravilima.
- (2) Ako predmet iz kojeg je ispit položen po svojoj sadržini i obimu približno odgovara predmetu koji je student upisao, može se priznati ispit u cjelini ako je predmetni profesor ocijenio da je student kroz obrađeni i položen program stekao znanje i vještine u mjeri dovoljnoj za priznavanje ispita.
- (3) Priznavanjem ispita priznaje se i ocjena kojom je student ocijenjen na ispitu.
- (4) Broj bodova priznatog ispita utvrđuje se u skladu sa pravilima ECTS.
- (5) Ako postoji razlika u nastavnim programima položenih predmeta, utvrđuje se odgovarajuća razlika predmeta ili dijela predmeta koje je student dužan položiti. Student je dužan da u daljem školovanju na Univerzitetu položi utvrđenu razliku ispita i da stekne broj bodova predviđenih za upis u naredne godine studija u skladu sa odredbama ovih pravila.
- (6) Nakon okončanja postupka priznavanja položenih ispita, studentu prelazniku utvrđuje se status studenta na Univerzitetu.
- (7) Za provođenje procedure iz prethodnih stavova vijeće organizacione jedinice na prijedlog šefa odsjeka može imenovati posebnu komisiju.
- (8) Komisija iz prethodnog stava broji između tri i pet članova iz reda akademskog osoblja u zvanju nastavnika (docent/vanredni profesor ili redovni profesor).
- (9) Detaljna procedura i procesi u pogledu prelaza studenata i priznavanja ispita uređuju se posebnim pravilnikom kojeg usvaja Senat.

Član 21.

(Mobilnost studenata)

- (1) Studentu na Univerzitetu se može odobriti studijski boravak u okviru programa studijske mobilnosti unutar Univerziteta ili na drugim visokoškolskim ustanovama u Bosni i Hercegovini ili inozemstvu, a u skladu sa internim aktima Univerziteta.
- (2) Mobilnost studenata odnosi se na:
 - a) boravak studenata na drugom univerzitetu odnosno visokoškolskoj ustanovi u svrhu studija izvan ili unutar Bosne i Hercegovine;
 - b) kratke programe razmjene ili na cjelovite studijske programe koji završavaju dodjelom diplome.

Član 22.

(Prava studenata u okviru mobilnosti)

- (1) Univerzitet obezbjeđuje usaglašeno djelovanje svojih fakulteta u oblasti mobilnosti studenata oslonom na načelo uključenosti u međunarodni sistem visokog obrazovanja, a naročito u evropski sistem visokog obrazovanja u svrhu promocije internacionalizacije putem povećane mobilnosti studenata.
- (2) Studentu se tokom studiranja garantuje mogućnost mobilnosti, što uključuje i priznavanje bodova ostvarenih na drugom univerzitetu u skladu sa zakonskim propisima, ovim Statutom i drugim općim aktom Univerziteta odnosno fakulteta.
- (3) Student ima pravo da u toku studija provede jedan dio studijskog programa (jedan semestar ili duže) na drugom univerzitetu u zemlji ili inozemstvu, bez obzira na koji način je takva mobilnost podržana – posredstvom međunarodnih programa za razmjenu studenata, na bazi bilateralnih ugovora između univerziteta, sporazuma, projekata ili drugih oblika međunarodne saradnje.
- (4) Osnovna načela mobilnosti studenata na Univerzitetu, vrsta i trajanje mobilnosti, definicija i sadržaj pojmova kao što su: matična institucija, institucija domaćin, partnerska institucija, gostujući student i drugi pojmovi u vezi sa mobilnosti, te uvjeti i postupak prijave, prava i obaveze studenata kao i ostala pitanja povezana sa provođenjem programa mobilnosti preciznije se određuju posebni aktima Univerziteta.

Član 23.
(Gostujući studenti)

- (1) Na Univerzitetu mogu studirati gostujući studenti s drugih univerziteta iz Bosne i Hercegovine i inozemstva koji upisuju dijelove studijskog programa na Univerzitetu u skladu sa ugovorom između univerziteta.
- (2) Pohadanje nastave i položeni ispit gostujućeg studenta evidentiraju se u indeksu koji izdaje Univerzitet te dokazuju uvjerenjem o položenim ispitima.

Član 24.
(Mirovanje prava i obaveza studenta)

- (1) Prava i obaveze studenta miruju pod uslovima predviđenim Zakonom i ovim Statutom.
- (2) Univerzitet može na zahtjev studenta odobriti da mu iz opravdanih razloga određeno vrijeme, a najduže godinu dana, miruju prava i obaveze.
- (3) Pod opravdanim razlozima iz stava (2) ovog člana podrazumijevaju se slučajevi:
 - a) trajanja porodijskog odsustva;
 - b) trajanja trudnoće;
 - c) služenja vojnog roka;
 - d) ozbiljna bolest koja onemogućava studiranje u trajanju od najmanje jednog semestra; i
 - e) drugi opravdani slučajevi.
- (4) Postojanje opravdanih razloga iz stava (3) ovog člana student potvrđuje prezentiranjem dokaza dekanu fakulteta, izdatih od nadležne javne zdravstvene ili druge ustanove relevantne za svaki konkretni slučaj.
- (5) Dekan fakulteta donosi odluku po zahtjevu studenta iz stava (2) ovog člana, zadržavajući pravo na provjeru opravdanosti razloga iz stava (3) ovog člana.
- (6) Student kojem ne miruju prava i obaveze, a koji ne upiše narednu odnosno ne obnovi upis u istu studijsku godinu izjednačava se sa statusom studenta koji se ispisao sa Univerziteta.

Član 25.
(Zahtjev za mirovanje prava i obaveza)

- (1) Zahtjev za mirovanje prava i obaveza podnosi se prije nastupanja mirovanja, a nakon upisane studijske godine na kojoj će koristiti to pravo.
- (2) Izuzetno, zahtjev za mirovanje po osnovu bolničkog liječenja ili trudnoće može se podnijeti u toku studijske godine.
- (3) Rješenje po zahtjevu za mirovanje prava i obaveza studenta donosi dekan organizacione jedinice.

Član 26.
(Prestanak studentskog statusa)

Status studenta prestaje:

- a) okončanjem ciklusa studija;
- b) ispisom;
- c) isključenjem po postupku i uz uslove utvrđene Zakonom, Statutom ili drugim odgovarajućim aktom Univerziteta;
- d) kada student ne okonča studij u roku utvrđenom Zakonom i Statutom;
- e) kada student kojem ne miruju prava i obaveze ne upiše narednu godinu studija odnosno ne obnovi upis u istu godinu studija;
- f) u drugim slučajevima utvrđenim Zakonom, Statutom ili drugim općim aktom Univerziteta.

Član 27.
(Prava i obaveze studenta i studentski standard)

- (1) Student ima pravo i obavezu da, u skladu sa principima visokog obrazovanja, studira po usvojenim i odobrenim pravilima studiranja i nastavnom planu i programu te da bude ispitivan i ocjenjivan u skladu sa pravilima koja su transparentna, pravična i dostupna svakom studentu.
- (2) Prava i obaveze iz studentskog standarda su lična i neprenosiva.
- (3) Student ima pravo na:
 - a) prisustvovanje svim oblicima nastave;
 - b) kvalitetan nastavni proces u skladu sa usvojenim i odobrenim nastavnim planom i nastavnim programom;
 - c) blagovremeno i tačno informisanje o svim pitanjima koja se odnose na studij;
 - d) da na transparentan način bude upoznat o rasporedu nastave i ispitnim terminima na nivou studijske godine i to u prve dvije sedmice studijske godine;
 - e) ravnopravnost u pogledu uslova studija i tretmana, kao i na povlastice koje nosi status studenta;
 - f) različitost i zaštitu od diskriminacije;
 - g) pravo na zdravstvenu zaštitu u skladu sa Zakonom;
 - h) korištenje biblioteke i drugih usluga u skladu sa aktima Univerziteta;
 - i) konsultacije i pomoć akademskog osoblja u savladavanju nastavnog sadržaja, a posebno pri izradi završnog rada;
 - j) slobodu mišljenja i iznošenja ličnih stavova vezanih za nastavni sadržaj u toku realiziranja nastavnog procesa;
 - k) evaluaciju rada akademskog osoblja;
 - l) priznavanje i prenos bodova između visokoškolskih ustanova s ciljem osiguranja mobilnosti;
 - m) učešće u postupku izbora za studentsko predstavničko tijelo i druga tijela ustanovljena Statutom Univerziteta;
 - n) sudjelovanje u radu studentskih organizacija;
 - o) sudjelovanje u radu i odlučivanju tijela Univerziteta u skladu sa Zakonom i Statutom;
 - p) zaštitu u slučaju povrede nekog od njegovih prava na način utvrđen Zakonom ili općim aktima Univerziteta;
 - q) druga prava predviđena Statutom i drugim općim aktima Univerziteta.
- (4) Univerzitet je obavezan na svojoj internet stranici objaviti informacioni paket odnosno studentski vodič koji sadrži informacije o pravima studenata koja ostvaruju tokom studija kao što je način ostvarivanja zdravstvene zaštite studenata, studentskom udruženju na fakultetu, sekcijama koje su na raspolaganju studentima, programima mobilnosti kao i druge relevantne informacije.
- (5) Sadržaj informacionog paketa odnosno studentskog vodiča određuje dekan za studente.
- (6) Univerzitet je dužan da organizira orijentacioni dan za studente koji prvi put upisuju Univerzitet, kako bi ih upoznali sa njihovim pravima i obavezama, načinu izvođenja studija, kao i načinu organiziranja studenata, te njihovom uključivanju u tijela odlučivanja.
- (7) Student ima sljedeće obaveze:
 - a) pridržavati se pravila studiranja Univerziteta;
 - b) ispunjavati nastavne i druge obaveze;
 - c) iskazivati poštovanje prema pravima akademskog i neakademskog osoblja, kao i pravima drugih studenata Univerziteta;
 - d) uredno izvršavati svoje studijske obaveze i učestvovati u akademskim aktivnostima;
 - e) poštivati kućni red Univerziteta, etički kodeks i kodeks ponašanja i oblačenja; i
 - f) uredno ispunjavati ugovorom preuzete obaveze.

Član 28.
(Prava studenata sa poteškoćama u razvoju i osoba s invaliditetom)

- (1) Studentima sa posebnim statusom (studenti sa invaliditetom, studenti koji su roditelji djeteta kojima je neophodna posebna njega, samohrani roditelj, trudnica, porodilja, studenti koji učestvuju na međunarodnim takmičenjima, kao i studenti vrhunski sportisti) priznaje se pravo na individualizaciju u postupku realizacije nastavnog procesa, odnosno prisustvovanje nastavi, pauziranje studijskog procesa, učestvovanje u izvođenju pojedinih nastavnih sadržaja, kao i na vrednovanjima postignuća studenata.

- (2) Licima sa utvrđenim invaliditetom osiguran je pristup visokom obrazovanju na bilo kojem studijskom programu u okviru prvog ciklusa studija, pod uslovom da je lice:
 - a) položilo prijemni ispit;
 - b) sposobno obavljati praktične zadatke u nastavi;
 - c) steklo pravo upisa na odgovarajući ciklus studija i
 - d) dostavilo dokaz nadležne institucije o statusu lica sa invaliditetom i procentu invaliditeta.
- (3) Univerzitet je obavezan obezbijediti prostornu pristupačnost za studente sa poteškoćama i invaliditetom za sve prostorije koje student koristi u toku trajanja nastavnog procesa.
- (4) Studenti sa poteškoćama i invaliditetom (oštećenje vida, sluha, motorički poremećaji, hronične bolesti, specifične teškoće u učenju itd.) imaju pravo na prilagođeni način polaganja ispita i ispunjavanja drugih obaveza u toku studijske godine.
- (5) U zavisnosti od vrste i stepena tjelesnih poteškoća, odnosno stepena invaliditeta, studentu se na njegov zahtjev osigurava ostvarivanje sljedećih prava:
 - a) adekvatno produženje vremena za pismeni ispit;
 - b) mogućnost rada pismenog ispita usmeno i obratno;
 - c) pisanje ispita uz pomoć asistenta (npr. asistent slijepom studentu čita pitanja, on odgovara, nakon čega njegove odgovore asistent zapisuje na odgovarajući test);
 - d) osiguranje odgovarajućeg formata pismenog ispita (uvećani font i sl.) za slabovidne studente;
 - e) druga prava u skladu sa konkretnim potrebama studenta u pitanju.
- (6) Univerzitet odnosno fakultet može posebnim aktom detaljnije urediti prava i način postupanja za studente sa poteškoćama u razvoju i invaliditetom.

Član 29.

(Nastavak studija nakon ispisa ili isključenja)

- (1) Nakon isteka perioda na koji je student isključen, student ima pravo da nastavi studije.
- (2) Odluku po zahtjevu studenta donosi dekan organizacione jedinice.
- (3) Ukoliko se odobri ponovni upis, student je dužan nastaviti studije po studijskom programu koji važi u studijskoj godini u kojoj nastavlja studije.

V. VREDNOVANJE RADA STUDENATA

Član 30.

(Postupak provjere znanja i ocjenjivanja)

- (1) Znanje i rad studenata provjerava se i ocjenjuje tokom nastave o čemu se vodi evidencija na način utvrđen odlukom vijeća organizacione jedinice, a konačna ocjena se utvrđuje na ispitu.
- (2) Provjera znanja se vrši dodjeljivanjem bodova za svaki oblik aktivnosti i provjere znanja u toku semestra, kao i na završnom ispitu, na kojem se utvrđuje konačna ocjena. Utvrđeni elementi vrednovanja pojedinih aktivnosti, odnosno propisanih oblika provjere znanja, obavezno se provode kao jedinstvena cjelina u tekućoj studijskoj godini.
- (3) U strukturi ukupnog broja bodova, najmanje 50% bodova mora biti predviđeno za aktivnosti i provjere znanja u toku semestra. Na završnom ispitu student ne polaže gradivo ispita koje je tokom semestra uspješno okončao, izuzev u slučaju kada želi da poboljša broj osvojenih bodova, što se preciznije utvrđuje aktom vijeća organizacione jedinice.
- (4) Završni ispit se polaže u redovnom i popravnim terminima ispitnih rokova u skladu sa Zakonom i Statutom.
- (5) Ako student za predviđene aktivnosti i provjere znanja tokom semestra osvoji broj bodova koji zadovoljava uslove za prolaznu ocjenu takvom studentu se može upisati prolazna ocjena bez dodatne provjere znanja u skladu sa silabusom nastavnog predmeta.
- (6) Studentu koji obnavlja godinu studija, odnosno koji je prenio ispit u narednu studijsku godinu priznaju se ostvareni bodovi i uredno izvršene obaveze i to u trajanju jedne studijske godine. Zahtjev za prenošenje osvojenih bodova se podnosi u roku od tri sedmice od početka semestra u kojem je taj predmet registrovan.
- (7) Prisustvo na nastavi nije dio ocjene, te se ne uzima u obzir prilikom odlučivanja o zaključnoj ocjeni studenta.

- (8) Završni ispit kao i druge nastavne aktivnosti dozvoljeno je realizirati u okviru sedmice i to u vremenskom terminu od 8:00 do 20:00 sati.

Član 31. (Prisustvo na nastavi)

- (1) Prisustvo na časovima predavanja i vježbi je obavezno za sve studente koji pohađaju redovan studij.
- (2) Predmetni nastavnici vode evidenciju prisustva studenata na predavanjima i praktičnoj nastavi, koja je potvrđena vlastoručnim potpisima studenata, te se sedmično ažurira na informacijskom sistemu kojem pristup imaju svi studenti. Lažiranje potpisa strogo je zabranjeno i podliježe disciplinskim mjerama u skladu sa općim aktima Univerziteta.
- (3) Studenti koji na predavanja ili praktičnu nastavu kasne više od 15 minuta mogu prisustvovati nastavi, ali ne i biti uvedeni u evidenciju prisutnih studenata.
- (4) Evidencija iz stava (2) ovog člana vodi se na jedinstven način za svaki nastavni predmet.
- (5) Studenti mogu pravdati izostanke sa nastave odgovarajućim opravdanjima koja dostavljaju šefu odsjeka na procjenu opravdanosti. Na odluku šefa odsjeka, student ima pravo žalbe dekanu organizacione jedinice, koji mora donijeti odluku u roku od dva dana od dana podnošenja žalbe.
- (6) Odluka dekana iz prethodnog stava je konačna.
- (7) Opravdanje iz stava (5) ovog člana se mora dostaviti najkasnije pet radnih dana od dana povratka studenta na nastavu. U suprotnom, automatski će biti odbačeno kao neblagovremeno.
- (8) Studenti kojima se na osnovu evidencije iz stava (2) ovog člana utvrdi izostanak u obimu od 30% nastavnih sati predviđenih planom i programom za pojedini predmet ne mogu pristupiti završnom ispitu i obavezni su ponovo prisustvovati realizaciji nastave iz istog predmeta.

Član 32. (Organizacija ispita, praktičnog i stručnog rada kod pojedinih oblika nastave)

- (1) Organizacija i izvođenje ispita u pravilu se provodi u sjedištu Univerziteta, osim u slučajevima predviđenim Statutom visokoškolske ustanove Internacionalni Burč univerzitet-International Burch University, kao i za studijske programe koji se realiziraju DL oblikom nastave.
- (2) Praktični rad i stručna praksa mogu se organizirati i realizirati kao sastavni dio nastave u sjedištu Univerziteta ili na mjestu njihove realizacije, odnosno u nastavnoj bazi Univerziteta/fakulteta.
- (3) Univerzitet i fakultet, na osnovu sporazuma zaključenih sa drugim institucijama i pravnim licima, uređuju pitanja obavljanja stručne prakse predviđene nastavnim planom i programom.
- (4) Prilikom obavljanja stručne prakse iz stava (3) ovog člana, studenti su dužni voditi evidenciju i po završetku istu predložiti predmetnom profesoru.
- (5) U evidenciju o obavljenoj stručnoj praksi se obavezno unose podaci o poslodavcu, opis poslova koji su obavljani u toku trajanja prakse, podaci o mentorstvu, stečenim vještinama, kao i drugi podaci na osnovu kojih se može izvršiti procjena znanja studenta stečenog u toku stručne prakse.
- (6) Status nastavne baze na prijedlog vijeća fakulteta utvrđuje Senat, uz prethodno pribavljeno mišljenje Upravnog odbora Univerziteta.

Član 33. (Vrednovanje znanja studenata)

- (1) Konačan uspjeh studenata nakon svih predviđenih oblika provjere znanja, vrednuje se i ocjenjuje sistemom ocjenjivanja kako slijedi:
 - a) 10 (A) – izuzetan uspjeh bez grešaka ili sa neznatnim greškama, nosi 95-100 (devedeset pet – stotinu) bodova;
 - b) 9 (B) – iznad prosjeka, sa ponekom greškom, nosi 85-94 (osamdeset pet – devedeset četiri) bodova;
 - c) 8 (C) – prosječan, sa primjetnim greškama, nosi 75-84 (sedamdeset pet – osamdeset četiri) bodova;
 - d) 7 (D) – općenito dobar, ali sa značajnijim nedostacima, nosi 65-74 (šezdeset pet – sedamdeset četiri) bodova;
 - e) 6 (E) – zadovoljava minimalne kriterije, nosi 55-64 (pedeset pet – šezdeset četiri) bodova;
 - f) 5 (F) – ne zadovoljava minimalne kriterije, manje od 55 (pedeset pet) bodova.
- (2) U indeks i/ili drugu ispravu unose se prolazne ocjene.
- (3) Ocjena iz stava (1) tačka e) je najniža prolazna ocjena.

- (4) Senat može na prijedlog vijeća fakulteta, za pojedine nastavne predmete, utvrditi sistem ocjenjivanja izražen u slovniim ocjenama (P – položio i N – nije položio).

Član 34. (Oblici provjere znanja studenta)

- (1) Oblici provjere znanja studenta su javni, a mogu biti pismeni, usmeni i praktični.
- (2) Provjera znanja je u pravilu pismena i vrši se putem testa ili pismenog rada.
- (3) Pismeni testovi iz prethodnog stava podrazumijevaju i ispite koji se organiziraju kroz informacionu platformu Univerziteta (engl. *Learning Management System*).
- (4) Rezultati pismenog, usmenog i praktičnog dijela ispita moraju biti objavljeni na internet stranici, studentskom informacionom sistemu ili oglasnoj ploči u roku 5 (pet) radnih dana do 50 (pedeset) studenta koji izlaze na ispit, odnosno u roku od 8 (osam) radnih dana za preko 100 (stotinu) studenata koji izlaze na ispit, a najkasnije do 4 dana prije novog termina za polaganje ispita uz obavezno oglašavanje termina u kojem će se studentu omogućiti neposredan uvid za pismeni i praktični dio rada.
- (5) Konačna ocjena se unosi u informacioni sistem studentske službe Univerziteta u roku od 3 (tri) radna dana nakon isteka rokova za rješavanje eventualnih žalbi na rezultate ispita ili ponavljanje ispita pred komisijom.
- (6) Ukoliko na osnovu uredno podnesene prijave bude prijavljen samo 1 (jedan) student za završni ispit predmetni nastavnik će osigurati princip javnosti polaganja ispita na način da će prilikom polaganja ispita prisustvovati još najmanje 1 (jedan) nastavnik/saradnik odnosno fakulteta.
- (7) Pismeni ispitni radovi studenata se čuvaju do kraja studijske godine u kojoj je student polagao ispit.
- (8) Student može biti opterećen polaganjem najviše 1 (jednog) ispita u istom danu na svojoj studijskoj godini.

Član 35. (Postupak provjere znanja i ocjenjivanja)

- (1) Znanje i rad studenata provjerava se i ocjenjuje tokom nastave o čemu se vodi evidencija na način utvrđen odlukom vijeća fakulteta, a konačna ocjena se utvrđuje na ispitu.
- (2) Provjera znanja studenta se vrši kontinuirano dodjeljivanjem bodova za svaki oblik aktivnosti i provjere znanja u toku semestra, kao i na završnom ispitu nakon završetka semestra.
- (3) Utvrđeni elementi vrednovanja pojedinih aktivnosti, odnosno propisanih oblika provjere znanja, obavezno se provode kao jedinstvena cjelina u tekućoj studijskoj godini.
- (4) U strukturi ukupnog broja bodova, najmanje 50% (pedeset) bodova mora biti predviđeno za aktivnosti i provjere znanja u toku semestra.

Član 36. (Završni ispit i ispitni rokovi)

- (1) Završni ispit se polaže u redovnom, popravnom i septembarskom ispitnom roku.
- (2) Nakon završetka zadnje, petnaeste sedmice studenti imaju jednu (šesnaestu) slobodnu sedmicu da se pripreme za polaganje završnog ispita.
- (3) Završni ispit u redovnom terminu se organizuje u 17. (sedamnaestoj) i 18. (osamnaestoj) sedmici. Vrijeme između završnog ispita u redovnom terminu i završnog ispita u popravnom terminu iznosi 2 (dvije) sedmice.
- (4) Studenti mogu polagati ispite u septembarskom ispitnom roku u 2 (dva) termina koji se preciznije definiraju akademskim kalendarom.
- (5) U prvom ispitnom terminu septembarskog ispitnog roka student ima pravo polagati sve ispite za koje ispunjava uslove da može pristupiti ispitu odnosno provjeri znanja.
- (6) U drugom ispitnom terminu septembarskog ispitnog roka student ima pravo polagati 1 (jedan) ispit.
- (7) Student se obavezuje da izvrši prijavu ispitnih obaveza putem studentskog informacionog sistema (SIS) u svim ispitnim rokovima, u protivnom predmetni nastavnik zadržava pravo da ne ocijeni onog studenta koji nije uredno izvršio obavezu prijavljivanja ispitne obaveze.
- (8) Ako student za predviđene aktivnosti i provjere znanja tokom semestra osvoji broj bodova koji zadovoljava uslove za prolaznu ocjenu takvom studentu se može upisati prolazna ocjena bez dodatne provjere znanja u skladu sa silabusom nastavnog predmeta.
- (9) Između održavanja završnih ispita u redovnom i popravnom terminu akademsko osoblje organizuje

konsultacije sa studentima, a po potrebi izvodi i dopunsku nastavu radi pomoći studentu da se pripremi za polaganje popravnog ispita, što se preciznije uređuje pravilima studiranja.

Član 37. (Akademsko nepoštenje)

- (1) Akademsko nepoštenje, odnosno plagiranje i varanje, strogo je zabranjeno.
- (2) Plagiranje podrazumijeva težu disciplinsku povredu u skladu sa Pravilnikom o disciplinskog i materijalnoj odgovornosti studenata, te je kažnjivo u skladu sa disciplinskim mjerama propisanim Pravilnikom.
- (3) Predmetni nastavnici dužni su poduzeti sve moguće mjere kako bi spriječili i identificirali sve vrste akademskog nepoštenja.

Član 38. (Polaganje ispita pred komisijom na zahtjev studenta)

- (1) Student koji nije zadovoljan postignutom ocjenom na ispitu može, u roku od 2 (dva) radna dana od dana objavljivanja rezultata ispita na oglasnoj ploči, podnijeti zahtjev da ispit ponovi pred komisijom.
- (2) Zahtjev za ponavljanje ispita iz stava (1) ovog člana mora biti obrazložen.
- (3) Dekan imenuje predsjednika i 2 (dva) člana ispitne komisije u roku od 2 (dva) radna dana od dana prijema zahtjeva iz stava (1) ovog člana, ako ocijeni da je zahtjev osnovan.
- (4) Predmetni nastavnik čijom ocjenom student nije zadovoljan ne može biti član niti predsjednik komisije, izuzev u slučajevima objektivne nemogućnosti održavanja komisijanskog ispita.
- (5) Dekan određuje termin polaganja ispita u roku od 3 (tri) dana od dana podnošenja osnovanog zahtjeva studenta.
- (6) U slučaju zahtjeva iz stava (1) ovog člana, pismeni ispit ili pismeni dio ispita neće se ponoviti pred komisijom, već će postojeći ocijenjeni pismeni rad komisija ponovno pregledati i ocijeniti, dok je ponavljanje usmenog ispita ili usmenog dijela ispita pred komisijom obavezno.
- (7) Prilikom utvrđivanja ocjene, komisija će uzimati u obzir sve verificirane rezultate rada studenta u toku nastave.
- (8) Kod prigovora studenta na ocjenu za praktični ispit iz onog predmeta čije polaganje nije moguće ponovno organizirati, komisija, imenovana od strane dekana, a sastavljena od nastavnika iz odgovarajuće oblasti, preispitat će odluku nastavnika koji je ispit ocjenjivao i to na osnovu audio/video zapisa i drugih oblika dokumentiranja polaganja ispita te donijeti konačnu odluku.
- (9) Za predmete iz stava (8) ovog člana Univerzitet, odnosno fakulteta je dužan osigurati audio/video zapis ili drugi adekvatan oblik dokumentiranja postupka provjere znanja.
- (10) Odluka komisije se donosi većinom glasova članova komisije.
- (11) U slučaju da student najkasnije 7 (sedam) dana prije održavanja ispita podnese obrazložen zahtjev za izuzeće predmetnog nastavnika, dekan je dužan u roku od 3 (tri) radna dana donijeti odluku o osnovanosti podnesenog zahtjeva.
- (12) Ukoliko je zahtjev studenta osnovan, dekan donosi odluku o formiranju komisije koja će provesti provjeru znanja studenta, a član akademskog osoblja čije izuzeće je traženo ne može biti član komisije.
- (13) U slučaju komisijanskog provođenja ispita, student ima pravo prisustvovati pregledu rada od strane komisije.

Član 39. (Razlozi za izuzeće člana akademskog osoblja sa provjere znanja)

- (1) Razlozi za izuzeće predmetnog nastavnika sa provjere znanja (parcijalni, završni ispit) su:
 - a) ako je protiv predmetnog nastavnika pokrenut ili je u toku disciplinski postupak iz razloga povrede studentskih prava;
 - b) ukoliko je predmetni nastavnik u porodičnoj vezi sa studentom, a radi se o ispitu na kojem je prisutan samo jedan student;
 - c) drugi razlozi objektivne prirode koji očigledno mogu uticati na nepristrasnost predmetnog nastavnika.
- (2) U slučaju iz tačke c) stava (1) ovog člana, dekan fakulteta donosi odluku na zahtjev studenta ili predmetnog profesora.

Član 40.
(Ponavljanje završnog ispita)

- (1) Ukoliko je student u toku semestra (uključujući i završni ispit) osvojio dovoljan broj bodova za neku od prolaznih ocjena navedenih u članu 28. ovih Pravila, ali nije zadovoljan postignutom ocjenom, ima pravo izaći na popravni ispit.
- (2) Nema ograničenja u broju popravnih ispita koje student može zahtijevati da polaže.
- (3) Na popravnom ispitu student ima pravo raditi parcijalni ispit u cilju poboljšanja broja ranije osvojenih bodova, samo završni ispit, ili i parcijalni i završni ispit.
- (4) U slučaju izlaska na popravni ispit, ocjena sa završnog ispita se poništava i važeća je ocjena koju student ostvari na popravnom ispitu.

Član 41.
(Imenovanje komisije za završni ispit)

- (1) U slučaju spriječenosti predmetnog nastavnika da održi završni ispit, dekan povjerava organizaciju i održavanje završnog ispita drugom nastavniku iz iste ili srodne oblasti, ili imenuje komisiju.
- (2) Komisija ima najmanje tri člana.
- (3) U komisiju mogu biti imenovani nastavnici iz istih ili srodnih oblasti.
- (4) Odluku o ocjeni komisija donosi većinom glasova.
- (5) Odluka komisije je konačna.
- (6) Zapisnik o toku ispita i ocjeni komisija dostavlja dekanu organizacione jedinice.

Član 42.
(Prelazak u narednu studijsku godinu)

- (1) Student ima pravo prenijeti u narednu godinu studija unutar jednog ciklusa studija najviše 12 (dvanaest) ECTS studijskih bodova ili najviše 2 (dva) nepoložena predmeta bez obzira na vrednovanje, pod uslovom da nepoloženi predmet koji se prenosi u narednu studijsku godinu nije preduslov za slušanje predmeta u toj studijskoj godini.
- (2) ECTS bodovi za svaki pojedinačni predmet se priznaju nakon uspješno položenog predmeta.
- (3) Student koji je prenio ispite u narednu godinu ne može upisati još jednu višu godinu dok ne položi te prenesene ispite.
- (4) Studentu koji obnavlja godinu studija, Univerzitet, odnosno fakultet može dozvoliti unutar jednog ciklusa, u skladu sa svojim kapacitetima i organizacionim mogućnostima, pohađanje nastave i polaganje nastavnih predmeta iz naredne studijske godine pod uslovom da ukupno opterećenje studenata po semestru ne prelazi 30 (trideset) ECTS studijskih bodova, a što se preciznije uređuje statutom.
- (5) Studentu koji obnavlja godinu studija, odnosno koji je prenio ispit u narednu studijsku godinu priznaju se ostvareni bodovi i uredno izvršene obaveze i to u trajanju jedne studijske godine.
- (6) Odluku o obavezi prisustva nastavnom procesu iz nastavnih predmeta koje je student odslušao donosi vijeće fakulteta prije početka studijske godine.
- (7) Vijeće fakulteta može, na obrazložen zahtjev studenta, dopustiti studentu okončanje studija u kraćem vremenskom periodu od perioda trajanja ciklusa studija.
- (8) Kraći vremenski period trajanja studija iz prethodnog stava, može se dopustiti samo studentima koji u nastavi ostvaruju izuzetno uspješne rezultate, te koji uredno izmiruju finansijske obaveze prema Univerzitetu.
- (9) Period iz stava (8) ovog člana za prvi ciklus studija ne može trajati manje od 3 (tri) semestra za trogodišnji dodiplomski studij, odnosno (4) četiri semestra za četverogodišnji dodiplomski studij. Drugi ciklus u smislu stava (8) ovog člana može trajati najmanje 2 (dva) semestra, a treći ciklus studija najmanje 3 (tri) semestra.
- (10) Ukoliko je student položio sve ispite, izuzev završnog rada, ima pravo polagati završni rad u toku tekuće studijske godine, bez obzira na ispitne rokove utvrđene ovim zakonom.

Član 43.
(Ovjera semestra i studijske godine)

- (1) Ovjera semestra i studijske godine obavezna je za sve studente.
- (2) Na osnovu ovjerenog semestra i studijske godine utvrđuje se broj ECTS studijskih bodova koje je student postigao.
- (3) Ovjera semestra i studijske godine vrši se prijavom i registracijom predmeta kojeg student može slušati u narednom semestru.

Član 44.
(Završetak ciklusa studija)

Studij smatra se uspješno završenim ako je student položio sve ispite i odbranio završni rad ukoliko je predviđen odgovarajućim studijskim programom.

Član 45.
(Akademska titula, naučno, umjetničko i stručno zvanje)

- (1) Završetkom prvog ciklusa studija stiče se pravo na određenu akademsku titulu, odnosno stručno i/ili naučno, umjetničko zvanje, u skladu sa pravilnikom o stjecanju i korištenju akademskih titula, te sticanju stručnih i naučnih, umjetničkih zvanja, kao i druga prava u skladu sa posebnim propisima.
- (2) Akademske titule, naučna, umjetnička i stručna zvanja na diplomama, dodacima diplomama i ispravama koje izdaje Univerzitet navode se kako u muškom, tako i ženskom gramatičkom rodu.

VI. PRIPREMNA ŠKOLA ENGLESKOG JEZIKA

Član 46.
(Organizacija i program Pripremne škole engleskog jezika)

- (1) Na Univerzitetu se organizuje pripremna edukacija putem podorganizacione jedinice Pripremne škole engleskog jezika u trajanju od jedne godine.
- (2) Cilj pripremne škole engleskog jezika je da kandidat koji se upisuje na Univerzitet, a čiji nivo poznavanja engleskog jezika nije zadovoljavajući, unaprijedi svoje znanje na nivo na kojem može pratiti nastavu na engleskom jeziku ponuđenu na Univerzitetu.
- (3) Program Pripremne škole engleskog jezika osmišljen je za opće i specifične namjene, u skladu s potrebama akademskih programa Univerziteta. Plan i program Pripremne škole engleskog jezika se sastoji od osnovnih vještina kao što su čitanje, pisanje, razumijevanje i govor, a pored tih vještina, obuhvaća engleski jezik za određenu namjenu orijentiran za specifična akademska polja.

Član 47.
(Polaganje ispita znanja engleskog jezika)

- (1) Trajanje Pripremne škole engleskog jezika u pravilu iznosi jednu godinu, odnosno kraće ili duže u zavisnosti od nivoa savladanog znanja engleskog jezika od strane kandidata, nakon čega se organizuje završni ispit.
- (2) Kandidati koji polože završni ispit Pripremne škole engleskog jezika imaju mogućnost da upišu prvu godinu studija uz ispunjavanje ostalih kriterija za upis.
- (3) Za studente koji imaju naprednije znanje engleskog jezika, završni ispit znanja je moguće organizovati i na kraju svakog stepena u okviru Pripremne škole.
- (4) Odluku o strukturi i broju stepena engleskog jezika iz prethodnog stava donosi Senat Univerziteta na prijedlog Pripremne škole engleskog jezika.

Član 48.
(Detaljnija organizacija)

- (1) Detaljnija organizacija programa Pripremne škole engleskog jezika, kao i druga pitanja od značaja za rad Pripremne škole engleskog jezika uređuju se posebnim općim akom, kojeg donosi Senat Univerziteta.
- (2) Ukoliko se ukaže potreba pripremu školu moguće je organizovati i iz drugog stranog jezika.
- (3) Odluku o pripremono školi iz drugog stranog jezika donosi Upravni odbor Univerziteta na prijedlog Rektora.

VII. ZAVRŠNI RAD (DIPLOMSKI RAD)

Član 49.
(Završni rad)

- (1) Studijskim programom prvog ciklusa može biti predviđen završni rad.
- (2) Vrijeme početka izrade završnog rada mora biti usklađeno sa obimom završnog rada tako da student može pristupiti odbrani istog najkasnije do kraja semestra, a obavezno prije početka upisa u naredni ciklus studija.
- (3) Završni rad piše se na jeziku na kojem se izvodi nastava.

Član 50.
(Tema završnog rada)

- (1) Tema završnog rada mora biti iz oblasti studijskog programa.
- (2) Iz razloga multidisciplinarnosti teme završnog rada, studentu se može odrediti i više od jednog mentora.
- (3) Student predlaže mentora iz reda nastavnika koji mu je, kada prihvati dužnost mentora, obavezan pružiti stručnu pomoć u postupku izrade završnog rada.
- (4) Temu završnog rada predlaže mentor. Studentu se može odobriti i tema završnog rada koju samostalno predloži, uz pisanu saglasnost mentora.
- (5) Studentu se može odobriti zamjena mentora ili teme završnog rada, a odluku o tome po zahtjevu studenta donosi vijeće fakulteta.
- (6) Fakultet je dužan obezbijediti dovoljan broj tema i mentora za realizaciju završnih radova za sve studente koji su za to ispunili uslove.

Član 51.
(Prijava završnog rada)

- (1) Završni rad prijavljuje se nadležnoj službi organizacione jedinice.
- (2) Student stiče pravo da prijavi završni rad kada opterećenje registrovanih predmeta i predviđeno opterećenje po osnovu završnog rada ne prelazi 30 ECTS bodova.
- (3) Prijava završnog rada obuhvata sljedeće podatke:
 - a) radni naziv teme;
 - b) naziv predmeta;
 - c) datum prijave i potpis mentora.
- (4) Ispunjena i potpisana prijava ovjerava se i odlaže u dosije studenta.

Član 52.
(Predaja završnog rada)

- (1) Student formira završni rad u konceptu sa svim pripadajućim dijelovima.
- (2) Koncept se predaje nastavniku na uvid i pregled.
- (3) Student je dužan postupiti prema uputstvima i primjedbama nastavnika, u protivnom rad se vraća na dalju doradu.

- (4) Nastavnik je dužan da pregleda rad i vrati ga sa komentarom najkasnije za tri nedjelje od dana predaje rada.

Član 53. **(Provjera završnog rada)**

- (1) Svaki odsjek odnosno studijski program će za sebe odrediti obaveznost postupka elektronske provjere obima i sadržine podudaranja teksta završnog rada sa tekstovima koji su dostupni za poređenje uz pomoć specijaliziranog programa (engl. *similarity check software*) kojeg je obezbjedio Univerzitet.
- (2) Nadležna služba Univerziteta obezbjeđuje pristup svim članovima univerzitetskog akademskog osoblja specijaliziranom programu za provjeru podudarnosti teksta, a članovi osoblja su obavezni poštovati pravila korištenja programa i povjerljive informacije ne dijeliti sa drugim licima.
- (3) U slučajevima kada je propisana obavezna provjera završnog rada iz ovog člana, na nivou svakog odsjeka će se odrediti način provjere radova od strane mentora odnosno članova akademskog osoblja tog odsjeka, maksimalni procenat podudarnosti i druge tehničke specifikacije uzimajući u obzir specifičnost naučne odnosno umjetničke oblasti završnog rada.
- (4) U slučajevima kada je propisana obavezna provjera završnog rada iz ovog člana, mentor je obavezan pregledati izvještaj, razmotriti podudarnosti i ukazati studentu na eventualne korekcije. Kada mentor uoči neprihvatljive nivoe podudarnosti, nedostatke i slično, iako rad formalno ispunjava propisani maksimum podudarnosti i druge tehničke karakteristike, može zahtijevati od studenta, prema vlastitoj procjeni i u skladu sa akademskim standardima i *lege artis* svoje naučne odnosno umjetničke oblasti, dodatne izmjene završnog rada.
- (5) Na prijedlog šefa odsjeka odnosno studijskog programa, vijeće fakulteta može odrediti da se izvještaji o završnom radu iz ovog člana učine dostupnim na uvid svim članovima vijeća. Svaki član komisije za odbranu završnog rada ima pravo zahtijevati dostavljanje izvještaja iz ovog člana na uvid kako bi se upoznao sa rezultatima izvještaja.
- (6) Prilikom korištenja programa i pregleda izvještaja, mentor i drugi učesnici u postupku ocjene završnog rada moraju voditi računa o sljedećem:
 - a) cilj provjere putem korištenja programa za provjeru podudarnosti teksta je da se utvrdi da li i u kojoj mjeri je završni rad originalan odnosno predstavlja rezultat rada studenta i da li i u kojoj mjeri su poštovana akademska pravila citiranja, navođenja izvora i sl.;
 - b) izvještaj o provjeri završnog rada predstavlja samo indiciju o njegovoj originalnosti;
 - c) podatak o količini podudarnosti teksta (engl. *similarity check index*), sam za sebe, nije dovoljan da opravda sumnju u originalnost završnog rada;
 - d) određena količina podudaranja teksta je nužna, kao posljedica citata, ličnih imena, bibliografskih podataka o literaturi i slično;
 - e) ocjena mentora o izvještaju se mora zasnivati na ukupnosti relevantnih kriterija kao što je količina podudaranja, povezanost, smisao i značaj dijelova teksta kod kojih je utvrđeno podudaranje, broj stranica rada i margine, prethodno objavljeni rezultati istraživanja tog studenta u naučnim časopisima i sl.
- (7) Provjera završnog rada propisana ovim pravilnikom ne isključuje primjenu drugih metoda provjere originalnosti rada.

Član 54. **(Odbrana završnog rada)**

- (1) Odbrana završnog rada sastoji se od usmenog izlaganja rezultata rada i obrazloženja izdvojenih zaključaka, kao i od prezentacije eventualnog praktičnog rada i odgovora na pitanja članova komisije u vezi sa rezultatima i zaključcima rada.
- (2) Ako student ne zadovolji na odbrani završnog rada, ima još jednom pravo na odbranu istog završnog rada ili da zatraži da mu se odobri izbor nove teme.
- (3) Završni rad i njegova odbrana ocjenjuju se jedinstvenom ocjenom: uspješno odbranio ili nije odbranio.
- (4) Ocjena se donosi većinom glasova članova komisije.
- (5) Odbrana završnog rada je javna.
- (6) Univerzitet je obavezan završne radove prvog, drugog i trećeg ciklusa studija objaviti na svojoj internet stranici u skladu sa zakonom te iste pohraniti na univerzitetski online repozitorij.

- (7) Nakon uspješne odbrane, završni rad se predaje u tri primjerka, ukoričena u tvrde korice na Studentsku službu Univerziteta u roku od 3 (tri) mjeseca od dana odbrane, a elektronski primjerak pohraniti na repozitorij završnih radova.

Član 55.
(Repozitorij završnih radova)

- (1) Nadležbe službe Univerziteta trajeno čuvaju elektronske verzije odbranjenih završnih radova na prvom ciklusu studija na repozitoriju završnih radova Univerziteta.
- (2) U završnom radu se kao obavezni sastavni dijelovi nalaze sljedeće potpisane izjave:
- a) potpisana izjava o autorstvu kojom se tvrdi da u završnom radu nema dijelova kojima se narušavaju autorska prava drugih lica. Sadržaj izjave propisuju nadležne službe;
 - b) potpisana izjava da su obe verzije, štampana i elektronska, istovjetne;
 - c) potpisana izjava kojom se ovlašćuje Biblioteka Univerziteta da čuva završni rad u repozitoriju te ga može učiniti dostupnu drugim licima pod uslovima definisanim Pravilnikom o raspolaganju intelektualnim vlasništvom.

Član 56.
(Zaštita rezultata istraživanja završnog rada)

- (1) Izrada završnog rada se vrši u skladu sa pravilima poštivanja i zaštite intelektualnog vlasništva, a u određenim slučajevima i u skladu sa propisima zaštite poslovne tajne.
- (2) U slučaju kada rezultati istraživanja završnog rada uključuju inovaciju podobnu za zaštitu prava intelektualnog vlasništva, student i mentor postupaju u skladu sa procedurom propisanom Pravilnikom o raspolaganju intelektualnim vlasništvom.

VIII. ISPRAVE O DIPLOMAMA

Član 57.
(Diploma)

- (1) Nakon završenog prvog ciklusa studija studentu se izdaje diploma kojom se potvrđuje da je student završio određeni ciklus studija i stekao pravo na određenu akademsku titulu odnosno stručno i/ili naučno zvanje.
- (2) Diplomu, kao javnu ispravu, izdaje Univerzitet.
- (3) Diplome potpisuju dekan fakulteta i Rektor Univerziteta
- (4) Uz diplomu, studentu se obavezno izdaje i dodatak diplomi.
- (5) Do izdavanja diplome, studentu se izdaje uvjerenje o diplomiranju kao javna isprava kojim se potvrđuje da je student ispunio uslove za stjecanje zvanja iz prvog ciklusa studija kojeg je završio.
- (6) Diploma i dodatak diplomi obavezno sadrži osnovne informacije o završenom prvom ciklusu studija, stečenom zvanju odnosno tituli i ostvarenom uspjehu studenta u toku studija.
- (7) Titule i stečena zvanja na diplomi, dodatku diplomi i uvjerenju o diplomiranju navode se kako u muškom, tako i u ženskom gramatičkom rodu.
- (8) Datum diplomiranja određuje se kao datum polaganja posljednjeg ispita odnosno datum uspješne odbrane završnog rada.
- (9) Datum za dodjelu diploma određuje Rektor, a nakon što student položi posljednji ispit.
- (10) Univerzitet može organizirati javnu dodjelu diploma, a iste se mogu dodjeljivati i po pisanom zahtjevu studenata.
- (11) Godišnja promocija apsolvenata/diplomanata koju organizuje Univerzitet ima isključivo svečani karakter, te nužno ne podrazumijeva i dodjelu diploma.

Član 58.
(Izdavanje duplikata diplome)

- (1) Na zahtjev kandidata može se izdati duplikat diplome pod uslovom da je okončan propisani postupak za poništenje diplome, odnosno proglašenje ranije izdate diplome nevažećom.
- (2) Zahtjev za izdavanje duplikata diplome podnosi se dekanu fakulteta koji je izdao poništenu diplomu. U sadržaju poslije naziva diplome, unosi se riječ "duplikat".

Član 59.
(Poništavanje i oglašavanje diplome nevažećom)

- (1) Univerzitet je obavezan poništiti i oglasiti nevažećom diplomu, dodatak diplomi i uvjerenje o stečenom zvanju u slučaju ako imalac diplome nije ispunio sve ispitne obaveze na studiju, na način i prema postupku koji je utvrđen propisima iz oblasti visokog obrazovanja koji su bili na snazi u vrijeme izdavanja javne isprave, zakonom i studijskim programom Univerziteta.
- (2) Oglašavanje nevažećom diplome, dodatka diplomi i uvjerenja o stečenom zvanju objavljuje se u "Službenim novinama Kantona Sarajevo".
- (3) Ukoliko diploma, dodatak diplomi i uvjerenje o stečenom zvanju sadrže grešku u imenu, broju, pisanju, kao i druge formalne netačnosti, ispravka se vrši u skladu sa zakonom kojim se uređuje opći upravni postupak.

Član 60.
(Izdavanje podataka iz službenih evidencija)

Podatke odnosno izvode iz matičnih knjiga i evidencija na zahtjev zainteresiranih studenata izdaje Univerzitet.

IX. PRELAZNE I ZAVRŠNE ODREDBE

Član 61.
(Tumačenje)

- (1) Za tumačenje odredaba ovih Pravila studiranja nadležan je Senat.
- (2) Stručne službe Univerziteta pružaju pomoć Senatu pri tumačenju pojedinih odredaba ovih Pravila.

Član 62.
(Stupanje na snagu)

- (1) Pravila stupaju na snagu danom donošenja, a primjenjivat će se počev od 2023/2024. akademske godine.
- (2) Izmjene i dopune ovog Pravilnika vrše se na način i po postupku propisanim za njegovo donošenje.
- (3) Odredbe Pravila studiranja koje su usklađene sa Zakonom o visokom obrazovanju Kantona Sarajevo („Službene novine Kantona Sarajevo“, broj: 36/22 i Standardima i normativima za obavljanje djelatnosti visokog obrazovanja u KS) se primjenjuju od stupanja na snagu ovih propisa.

Broj: 01- 344/23
Sarajevo, 27.09.2023. godine

PREDSJEDAVAJUĆI SENATA
Prof. dr. Mersid Poturak

Dostavljeno:
3x Fakulteti
1x Studentski parlament
1x a/a